



芝園集目錄

石集卷之四

古詩

五言

春日即事

墓門歌

過嚴子陵先生釣臺

登會稽山

遊朱宗伯座師山居樓閣

遊浙中往返幾三月塗次有感

壽喻太侯尊人



送匡郡丞容所還豫章

題黃安令劉公斗墟祖父傳

懷江右友人蕭觀吾康肖野

送莫廷韓北上

壽表兄董孝廉原晉

寄懷周使君雲望

寄懷蔣乾初徐惟仁二手丈

題彭協甫閒夫館

贈張五鹿隱君

贈陸君策新居

壽士中兄

贈魏醫士西郊

輓陳節婦

南遊次吳門別史舜舉

登惠山

錫山道中感賦兼贈孫世聲

雪中徐行甫筮抑之招飲賦謝

謁焦先生祠

王右軍瘞鶴銘

忘讐詩倣梁元帝鮑泉春日詩體

別南中友人

虞山逢黃仲高孝廉

謁子游墓

投謝陳錫玄孝廉

贈張虞侯再遊燕山

題畫魚

何氏芝園集

華亭何三畏士抑 著

古詩 五言

春日即事

我居城東隅俛仰何所有閒披古人書倦倚池塘柳
園中無佳蔬甕中有新酒醜之待客嘗為歌兔斯首
行行春水濱邂逅我良友兄弟與俱來牽衣復携手
木葉落庭除兒童擁箕帚入門歡笑多人世逢開口
有詩各自吟安問牝與牡曠然千秋期所志在不朽

何士抄其集
日月去如馳會晤良非偶但能得好懷提壺求其耦
願言常如此相知莫相負

墓門歌

嗟余濱海人托生在東土水木有本原何以人無祖
我祖營墓門刻石封其樹丸丸松柏枝鬱鬱當庭戶
覆蓋結重陰根大如車輔夫也日睥睨倚矣斯之斧
空墻一古丘乳燕巢荒廡歛噓墓中骨啣哀入肺腑
舉目情愴悽揮泪真成雨清明三月天道傍列篋簞
男婦哭于野扣盤擊土鼓帟陌挂杖頭辦香焚一炷

酌酒酒數行中天日亭午百年舉曠儀觀者人如堵
芊芊青草長慘慘啼猿舞流塵迷斷碑猶幸無豺虎
瞻彼行路者憇此杖之杜昔日神靈棲皇皇靡所主
子孫豈子遺不至為臣虜子孫豈乞兒有田亦有宇
子孫豈不賢撫仕膺簪組棹臂過其前耳袞目如瞽
古人不云乎丘木安可取身匪空桑生天將煉石補
臨淵徒羨魚胡不結網罟手欲植三槐上壓我諸父
我生已不辰况復逢茲苦回首重徘徊歎息今非古
聊為墓門歌歌罷髮盡豎訊之竟如何形影獨踽踽

夜夢鬼神號書驚麋鹿聚顛倒乃思予木枯株已腐
念此熱五中安得無多怒

過嚴子陵先生釣臺

我過嚴陵灘上有釣魚臺臺前怪石聳絕頂何崔巍
群峯突兀起浮雲奔蕩開空中聲咄咄不受故人催
癯然一釣叟羊裘未可回桐江幾尺絲高名千古推
渭濱去世邈漢事亦奇哉尋謁先生祠庭堦覆綠苔
顧瞻遺像久欲去終徘徊丈夫志遐舉富貴等纖埃
颯飄出塵想矯首睇蓬萊掃却一片石遲我歸去來

登會稽山

我登會稽山山高未可攀真高朝諸侯六龍駐其間
赫赫圖書府雖雖玉帛班不處者有戮所以過崇姦
美矣明德遠卓哉神功艱勾踐棲于此焦思何間關
烏喙能嘗膽孤臣墮黃管豈不實辛苦因之得生還
伯業千秋在忠魂一棹閒來游尋往跡日落水潺潺

遊朱宗伯座師山居樓閣

命作

虹霓掛飛閣乃在山之巔茲山何峻嶒群峰羅其前
翠微沒且見丹嶂斷還連山中有至人悟道得真詮

本以恬澹性常味道遙篇避世謝金馬于茲憇處焉
捫蘿瞰遠樹倚石臨高天杯浮陶令酒琴弄稽生絃
清風明月夕吐咳盡玄言巖樓成大隱樓居信神仙
光景絕寥廓徜徉以百年但願長閒暇追隨洞壑邊
遊浙中往返幾三月途次有感

翩翩若水棹泛泛武林舩森森古婺道渺渺山陰天
烟雨樓頭去錢塘江畔還去還秋復冬意氣何流連
山湖只如此風景已變遷所以達觀者行樂及其年
盛年不為樂青髯負媪然摘我園中蔬擊我池中鱖

座上客常滿頭上月常圓歡顏問酒觴去日不在前
百年亦一日可樂更可憐豈少烟霞癖而多塵世緣
俗人昧此理陶公吾所賢

壽喻太侯尊人

人言貴封公豈不貴榮名如公寥廓者世網寧一嬰
身作青山伴心與白鷗盟雅興在歌咏矢口成希聲
凭高時着屐對景但飛觥有子為循吏治行邁兩京
雄詞凌郢雪勁氣吐長庚公貴如子官不樂御簪纓
徜徉泉石間澹泊養幽貞所以彌爾性爾壽日以盈

素顏應不老能飛耀歲星何如介眉壽天酒貯金罍
吾聞豫章墟仙侶翔蓬瀛至人適其會從此信長生

送匡郡丞容所還豫章

吾郡大夫匡卓哉古循良三年親吏牘剔蠹燭毫芒
有茲罹重辟豈止證攘羊監司慕竒詭努力扼其旁
斤斤按三尺雷霆請獨當兩署郡邑篆士懷民以康
脂膏不一染冰雪守官常檄戢潢池警恩沾棠邑倉
專城二千石擘畫籍勸奏課上天子累剡經薦
揚云何當事者一朝飛語傷帝閣不可叩六月宵

頽霜吾儕多意氣慷慨之南大夫無愠色長嘯解
銀章歸來何所有羞澁一錢囊道傍碑是口坐席去
猶香郊關供祖帳擘袂之河梁宛轉難言別慙勤付
酒觴他年公論白蠖屈仍龍翔并州如在望雙鯉莫
忘將

題黃安令劉公斗墟祖父傳

天漢啟靈秘雲漢倬為章漳水灌百川廬峰踞上方
混沌忽抉破二老生其鄉冠冕忠義里德潤縣以長
乃有刺史公卓哉百鍊剛逢知斥城府結客摧肝腸

鶴立鷄群中瘦骨何昂藏強項不折腰願與餒虎嘗
緹騎猙可思械以囊與璫悲歌叩天闕六月飛嚴霜
烈士志苦辛齧檠如飴漿歷盡行路難遂得生還鄉
推逆本與源無乃有義方丈夫苟如此鳳翥蛟龍翔
忠孝兩無愧千古名馨香

懷江右友人蕭觀吾康肖野

望斷西江月依依有所思思君在建業邂逅赴襟期
意氣何慷慨綴文多吐竒紛紛都下士魁然稱白眉
交臂歡結納中情兩不疑一別遂千里五載成參差

魚魚郵尺書感君不遐遺我有蘭蕙草欲以贈故知
盼睽遙相憶會面將在茲把酒長安市看花太液池
願為雙鴻鵠努力春風時

送莫廷韓北上

九片芙蓉青飛來照行色送君今日行天南遂天北
逍遙帝城遊上苑花期亟才名洛下收駿骨燕中
識龍虎自風雲鸞鳳寧枳棘溲落已廿年一擊垂天
翼奏賦乘輿前天子亦憑軾浪高秋水槎斗氣何
相逼須臾秋復春明光共努力

壽表兄董孝廉原晉

與君昆弟親况復托肺附情好既以投我迺知其素
君性喜恬雅坦衷無俗務欣賞在遺編營營非所慕
暇為丘壑游日涉園林趣感興輒吟詩登高時作賦
有酒呼客嘗陶然覓良晤清謳叶金商玄言揮玉塵
榮榮萱草長粲粲瓊花吐借問當世人如君亦不數
年逾四十強朱顏大藥駐策對上彤庭翱翔詎云暮
跨鶴登瀛洲直是飛仙步月朗德星明賢人於此聚
進君紫霞觴飲君金莖露願言祝長年百歲今初度

寄懷周使君雲望

君才高白雪仕宦厲青雲所幸同閭里恨不早相聞
曩從燕市遊乃得通殷勤慚余久淪落猥瑣何足云
一見披心胃促席談夜分綢繆吐芳訊慷慨揚霧芬
賢豪世不少何如周使君別後思鬱結南睇隔斜曛
欲減魚腹信誰寄野人芹願言酬盛際努力策殊勲
寄懷蔣軋初徐惟仁二年丈

憶昔白下游幸承讌咲歡一自江干別已更兩歲寒
分手何其易覲面何其難鯉魚郵尺書恨不河水寬

何士抄芝園集
知君崇令德結駟且彈冠長嘯鳳凰臺高吟騷雅壇
所以孤賤子寸心勤握蘭安得命晨駕追隨復盤桓

題彭協甫閒夫館

借問世上人何人稱最閒少壯而至老終歲靡歡顏
誤墮塵網中百憂苦循環大夢時亦覺飛鳥倦且還
人生壽不百有淚徒潸潸達者解斯理閒適忘幽潺
吾友彭伯子強年髡未斑一朝棄儒紳願言絕世寰
生有丈夫子家有負郭田食惟一斗餐居惟一尺椽
自在閒夫館晨起苦有乃眠時值天氣佳素琴為我

親朋間來往詩酒相盤旋偃仰衡門下道遠洞壑遙
我亦居閒者與世忘媼妍一身百不憂中情無所牽
共子結襟期長此樂當年嗟彼身外名于我如浮烟
贈張五鹿隱君

古有萬石君恂恂何孝謹安得此長者而在今輓近
君本素心人冲夷絕脂粉所讀麟經篇高辭紆宿憤
坎珂不逢時良玉迺藏韞衡門自棲遯晨起觀山樵
身名若浮烟陶陶無俗忿使者旌其閭義聞當唇吻
斯人吾所欽卓哉稱真隱

贈陸君策新居

鴻鵠飛千里鷦鷯息一枝出幽乃遷喬良禽知所之
丈夫自有志高棲亦待時君本名家子個儻才多奇
世承清白吏蕭條三徑資詩書有遺牘尺寸無舊賢
拮据將不勝六翮奮澗池所志在肯構卜築城西居
寧令山水遠行與故廬辭匪以棘其欲奉我堂上慈
新燕雙雙來入戶巢當楣綠雲擁其室燁然生紫芝
宴坐南牕下展誦聲吾伊被褐詣公車濡毫上赤墀
奪端宮錦鮮衣之娛壽眉後園瑤草香前庭玉樹滋

儒者一畝宮祥風滿中逵誰云逆旅舍日月常如茲
余與君相結夙好同襟期綢繆何以贈聊為賦此詩
壽士中兄

皇祖百年來人人多壽考不煉勾漏砂非啖安期棗
咄哉帝與齡世德稱鴻寶我兄少負奇鬢序聲名早
落筆吐天葩淋漓五色草白壁屢暗投窓紗復幽討
長厚能自持素心如襁褓荏苒五十年玄髯猶未縞
以至携一樽嘯傲開懷抱懸弧當令辰初度秋砧擣
有子慨以慷為親祝蓬島宗黨洎賓朋賚酒香山道

三進紫霞觴願言長不老壺中日月春膝下風光好

贈魏醫士西郊

昨日出西郊郊外春光徧
樾花紅於錦李花白於練
飛鳥逐飄花下上聲宛囀
士也相婆娑惠風拂其面
魏家採藥翁鑿國稱時彥
書讀黃帝經夜探青囊卷
高嘯復長吟杏圃悠然見
對客彈枯棊奕思能忘倦
興至傾百杯良醞洵可戀
地偏有遠心業在無他羨
逍遙廣陌間名貴身寧賤
活人多禁方畱作先生傳

輓陳節婦

柏舟去世遠婦烈不復論
所以無婦烈風靡事少真
咄咄唐家女幼而嬪于陳
夫子蚤淪喪哭聲動城闈
皎日誓同穴死與鴻毛鄰
嬰兒方在抱吐哺艱且辛
嗚呼兒又歿奈何難殞身
所以忍死者堂有垂白親
埋此墓中骨感彼泉下人
一朝散千金義周夫黨貧
如何報夫子慷慨成吾仁
殺身百不贖七尺委香塵
血誠灑赤日竒節薄蒼旻
吾曹重俠烈况復粉黛倫
淒風苦雨夜慘慘欲沾巾
一歌三太息酌酒酒如銀
他日采風者啣詔勒茲珉

南遊次吳門別史舜舉

與君結納久真如弟與兄相別惆悵多相逢笑語傾
所托在肺腑一諾千金輕人生貴古處世網寧足嬰
深秋明月棹搖曳闔閭城別我舊知友從茲之帝京
我亦倦遊者胡然事遠征豈成丘壑癖非覓詩酒盟
有約赴雞黍無乃故人情雖匪經年別亦為千里行
握手河梁上黯黯驪歌聲

登惠山

我來惠山寺寺前奇石立携屐陟其巔露冷輕雲濕

山曲噴流泉細潛聲遠急注波寒潭中從人提壺汲
烹之與客嘗冷然花露吸客貽明月珠慷慨鮫人泣
及暮且盤桓下山旋復入山徑黃葉飛行行手自拾
錫山道中感賦兼贈孫世聲

陌上楓葉黃陌下蘆花白恍頭雨氣催灘頭水聲清
吾為行邁謀迢迢安所適登彼鳳凰臺寫我煙霞癖
朝夕誰與同有友稱莫逆標格迫雙眉文章原六籍
落紙雲霞飛潑墨湖山碧我匪作賦才枯腸無可索
相對出詩筒言言皆避席夜坐涼風生空中散玄液

我欲啜其華，曾成五色石。請與子賦詩，庶幾不辟易。
雪中徐行南，簷下之招飲賦謝。

仲冬嚴霜繁，况乃返寒節。夜卧無煖衾，晨起散輕雪。
四望鐵甕城，髣髴銀臺列。縣縣柳絮飛，皎皎波光晰。
從風捲復斜，憑雲聚旋滅。爛熳雖可憐，飄揚詎能擷。
我本離居人，念此憂心惓。一歌黃竹哀，再歌梁山閔。
感君不我遺，來尋雪中轍。袁安門始開，東郭履方結。
披衣帶雪過，戶外壺漿挈。媿我非嘉賓，主人何罄折。
幸及晚來晴，霽色堪怡悅。餘霰舞簷端，寒氣猶慘冽。

金盞坐令霜流飲，觴不輟相對。吐佳言，霏霏當玉屑。
燒燭信淹留，酒殺非徒設。誰云傾蓋驩，交情已自切。
醕酌夜厭厭，攬袂難為別。

謁焦先生祠

漢代焦先生，瀟然世外心。三詔三不起，結廬山之岑。
我來拜祠下，華表歸仙禽。芳魂不可即，踏遍松花陰。

王右軍瘞鶴銘

石在焦山，足為雷所擊，仆水落始得見之。

千年瘞鶴銘，勒在山根石。胡然雷電驚，沒此龍蛇跡。
神物留世間，沉淪良足惜。安得問水濱，五丁轉砂磧。

重摹六百言灑墨山雲赤

忘讐詩倣梁元帝鮑泉春日詩體

人世本無讐誰苦構讐仇無讐即無怨有讐即有憂
讐人祇讐已相讐乃相觸讐伏則晏安讐發則鴆毒
大讐不共天次讐不反兵君子好讐辨小人好讐爭
我不生讐端我不造讐孽胸中無讐腸口中無讐舌
失亦不讐得辱亦不讐榮既無讐親黨又無讐友生
彼或讐我名且或讐我真讐興如沸騰讐成如錦織
天地豈讐德鬼神豈讐仁日月照讐障風雨拂讐塵

外弗讐我身內弗讐我慮讐言起讐旋滅讐來讐輒去
何不讐青山何不讐白雲山雲詎讐爾爾讐讐殺君

別南中友人

余慚東海生君盡南州客邂逅長千里相看不相逆
桓以文章盟操觚侍几席晤言一室中從之討六籍
高談河海傾長嘯乾坤窄結社春及冬牽衣朝與夕
真如肺腑親無復形骸隔所志邁千秋垂名共竹帛
願言常如茲交情固金石忽然戀舊廬脂車戒行迫
雖云暫別離衷腸殊不懌群鳥依故渚一鳥奮歸翮

風波各天隅參商在咫尺別矣道路長怒焉愁傷積
蕭蕭起悲鳴黯黯銷魂魄感君不遐遺贈我以雙璧
媿無瓊瑤酬飲君玄玉液有信頻寄書慎勿踈蹤迹
安得會面期揮手話疇昔

虞山逢黃仲高孝廉

客來虞峰陽舟泊琴川口推篷聞人聲是我故交友
吳越渺難期忽然乃聚首勿問離居情但對一杯酒
秋至好題詩青山莫相負

謁子游墓

晚陟虞山岑來謁言游墓墓前草露滋墓下松雲蒼
飛兔穴荒原鳴烏巢枯樹文學標高蹤祠圯碑亦仆
淒楚空傷情遺像不一顧丘壟有廢興無乃亦天數
吾儕柴梓人眷言葺其故懷賢弔古悲灑泪千秋賦

投謝陳錫玄孝廉

古虞陳伯子咄咄名下士相逢交臂歡昔在長千里
離別十年餘又復逢燕市燕市無伯樂駿馬棄不視
高才未逢時坎軻乃如此我歸谷水陽子歸虞山此
懷人各一方郵書失雙鯉不謂今日來尊酒論知己

行杯但翹遠含情不勝喜携屐躡高峰放舟汎秋水
笙簧逐浪來歌嘯拂雲起樂哉芳晨遊良朋自應爾
與子盟素心金石寧終毀龍翔迺大來鵬翻有時起
豈以吾鄙才而厄窮途裏各事百年身願言愛玉趾

贈張虞侯再遊燕山

子為北上遊我作南歸客所以道路歧彼此顏相隔
長有一函書頻繫雙鴻翻知子令名揚逢迎多倒屣
相府開延津吐握勤赤舄憐才意良深殊遇迥標格
夙惟太史氏一見披肝膈亦有大司馬高坐資

紅塵綠綺裝紫駟黃金勒秋盡雁影稀冬到鄉心迫
都門祖帳陳歌驪起浮白一朝返閭井知己慰所思
及春常聚首為道離居悲層嵐遠天絕斷雲白日虧
參差已歲月會合方在茲輕烟入簾處繁花照酒時
冉冉秋風起忽賦行邁詩去年今日夕行與親故辭
雖云舊遊地河澣遠將之握別在頃刻懷思復淒其
此行何以贈贈子以言詞老驥志千里叢桂自有枝
弩力事霄漢隔歲鹿鳴期

題畫魚

何氏芝園集
卷之五
詩
一
滄海縱巨魚揚鬣欲飛躍風雷肯為神鱗甲乃有托
改服制豫且白龍亦尺蠖慎勿恃波濤作書報鯨鱓

何氏芝園集五言古詩完

芝園集目錄

石集卷之五

古詩

七言

題楊太宰二山桃花嶺圖

金華方令君岱陽邀飲聖覽樓

遊三洞

稽山歌

山陰道中

食蕭山蓴菜

渡曹娥江

放歌行

海甸春融贈詹郡伯

送徐司理檢吾擢南民部

詹太侯迎養太夫人

送燕郡丞鴻洲

贈項令君東鰲考滿

送洪九玄歸魯

壽項令君

贈許水道瀉川

贈張虞侯

送沈孺休遊豫章兼訊張宗伯鄧太史喻憲副

題朱明初麗

壽王令君懷我

贈別南中友人

有客七章章五句送尹公權南征應試

壽冲玄張先生

贈吳醫士端所

贈許山人丹山

何士柏詩集
送丘學博之山東

贈翁子德

題茗溪談氏永思堂

贈雲水道人

千人石夜坐同孫世聲史舜舉

贈丹徒令君張喻齋舊父母

咏張侯署中古栢

遊招隱寺同郭次甫陳從訓孫世聲

呈舅氏巢邑馬令君

遊攝山棲霞寺同孫世聲

渡江篇投陳比部子有

投贈表兄王後陽

贈殷比部開美

贈別東林含正孺兄弟

題許山人觀甫橋西草堂

壽陳從訓

贈倪偉長

送蘇甫宣歸吳門

送陳錫玄北上
送閩友王學博葵中補選北上

何氏芝園集

華亭何三畏士抑 著

古詩 七言

題楊太宰二山桃花嶺圖

昔有桃花源今有桃花嶺嶺上明月夜飛來月光半
照桃花影桃花開遍碧山頭綠睛童子彈箏簇桃花
亂落碧山足朱顏老叟吟天曲嶺前嶺後桃花紅花
中忽擁琉璃宮黃金之塔白玉廡花風鳥韻歌而舞
璠枝琪葉花更妍桃花欲笑迎神仙神仙環珮傳空

谷洞門花底眠玄鹿鹿啣花板嶺邊過絳綃天女紛
無數七星幢子百寶旂桃花捲上金縷衣縷衣繡出
朱緋色更有桃花映巾烏對花呼鶴復吹笙何須又
入芙蓉城芙蓉城中可搔首那如太宰桃花酒南極
瑶林北斗漿花紅酒綠丹砂香仙嶺年年日月長

金華方令君岱陽邀飲聖覽樓

樓在金華縣學宮後據山絕頂

處遠視之則萬疊輸青俯瞰之則雙溪環秀
真寶婺奇觀也昔高皇帝起兵曾駐蹕于此故樓以
聖覽名云

君侯挈我登高樓高樓之外千山稠四圍秀吐芙蓉

拆望去長虹挂蒼碧曾聞 聖祖初開基來乘六龍
提三尺數萬批貅列御屯如雲如雨陳戈戟 天王
一顧稱雄哉地霸山鬼俱徘徊半空擁出黃金臺
前星斗璀璨開於樂辟雍從中起宮墻直插層雲裏
王氣氤氳豪傑生科名理學垂千紀當年仕宦勒銀
羈春風飄拂寶馬嘶四方賓客來登陟啣盃命酒時
棲息誰人到此不賦詩坐對山色空淒其誰無感慨
不弔古戲馬堂傾罷歌舞婺州守令多循吏君侯賦
政稱尤異我來上邑聞絃歌誼結金蘭權把臂同年

何士松之園集
兄弟遇異鄉文星高照福星傍雙星千里聚一堂樓
中烟爍多光芒君揮毫我受簡當世詩盟君作縮我
怯風流不似君低眉欲賦慚青眼笙簧鼎沸度朱絃
徙倚凭闌酒正酣主人酪酏客亦醉醉來擊筑歌聲
比溪風送去白雪涼山雨飛來紫烟媚君侯聽之撫
掌笑將無謂我書生肆

遊三洞

三洞為雙龍洞水壺洞朝真洞蓋發中
而會以公事阻乃命從吏治具相隨每至洞
壑奇絕處即呼酒命酌亦人生快游也因志

歌以

寶婺列名山山色有無間下如廬山之根綿亘數百
里上如君山之巔縮結十二鬟古來三洞稱幽鬱洞
間往往藏神物我從此地望山焜地主幸逢方使君
使君為語探奇異張具郊門趣攬轡我策青驄出遠
城眼中一望芙蓉明透迤盤曲三十里滿路烟霞拂
面生講堂洞壑凌千仞空中髣髴聞人聲怪石稜層
如覆蓋涓流點點滴為帶翻身直到雙龍谿雙龍勢
欲飛霄外洞底冰壺別一天冰壺洞口噴飛泉乘輕
橈迴小舫凌風送入山之麓昏黑狂呼舉火來山光

漸逐火光開中有石柱上有乳蒼苔封剝絕塵埃覓
得芒鞋着兩脚踏徧崎嶇轉綽約扶杖相隨有幾人
笑語喧闐不寂寞東來數里傍山行朝真洞外多秦
荆畫道崔魏不可櫻我獨攀蘿陟其上極目山川緲
相望杳然深處白雲閒時說神仙采藥還我欲問之
求不老得來大樂駐朱顏落暉未盡尋幽意從人山
曲携壺至陡然有酒潤枯腸掃筆畱題在荒寺

稽山歌

神仙官署傍雲邊三十六洞壺中天越王宮闕嗟可

在空懸孤月照山前山前青草覆高隴人言此是大
夫種當年臣主共苦辛今日淒淒丘木拱出門十里
繞山去望見茂林脩竹處右軍記事復揮毫留得蘭
亭騫鳳翥南來緩步禹王陵欲識前朝問老僧金書
玉簡藏其下風雲護之狐不升遙憶新妝浣紗女劍
成歐冶空中舉前村望斷夕陽斜一水脈脈共誰語

山陰道中

山陰道中風景多盤旋紆折山與河山如叢翠河如
錦畫工有筆難搜羅舟子呼風急欲渡行帆帶得夕

陽過夕陽兩岸教春住飛入船窓送擢歌

食蕭山蓴菜

蓴菜產于湘湖

山中水蘊有蓴菜其味一何甘且奇湘湖絕類雲間
種忽起秋風張翰思蓴欲作羨鱸作鱸千里命駕隨
所之美菜已令入我口誰憐故里鱸魚為遊子只今
忘俗想可以逍遙山水期借問嶺雲與江月此日那
令負酒卮

渡曹娥江

片帆渡江江水發江邊女子埋枯骨死父浮屍事亦

奇黃絹碑文寧泯沒我今弔古欲招魂悲歌直指頭
上髮兩岬無風天無雲但見祠前一灣月

放歌行

君不見天邊之鴻鴈湖上之鴛鴦飛鳴兩兩歡成行
誰家女兒誰家郎秋風相對雙琳琅紅粉席間頻笑
語沉香亭畔解貂璫郎今欲往燕山去倚棹追隨整
舊妝直送蕭關河水北便從蘭舫奏笙簧當歌歌數
章進酒酒數觴朱顏澁澁羞斜月素手纖纖弄夕陽
歌殘酒歇燭將滅美人欲醉客欲狂散髮低眉爭覓

何士抄卷四集
句尊前一夕賦瀟湘緝商綴羽吳雲合對白抽黃暮
雨涼客有臨風憑几而聽者望瀛洲以寄想撫嬌女
而懷傷霓裳一拂為郎起星光淡淡水湯湯孤舟獨
宿泪如雨徘徊子夜思徬徨何事郎君多薄倖錯教
天上看星張鏡臺衣帶空留戀夢到巫山合斷腸身
逐南雲終汗漫心依北雁共翱翔折柳贈郎郎不住
寄語呼郎郎莫忘雙闕裏五雲傍今年八月美秋濤
明年二月乘春浪歸時還繫同心結共飲金尊月下
霜

海甸春融贈詹郡伯

海波融融浴初日須臾萬象珊瑚赤雲中擁出琉璃
宮迴光却射九峯側九峯蒙茸帶春色柳花婀娜桃
花碧燕子啣花掠草茵兒童竹馬歌太平千門萬戶
齊皞皞舉手加額能自陳前年汜濫龍蛇宅去年千
里如龜坼今年麥穗生兩歧秋毫摠賴君侯力亭障
鼓鼙寂不鳴發倉賑貸先窮民潢池波清劔鋒冷四
境多聞絃誦聲郊原芄芑黍苗秀桑柘初肥春社候
社酒歸來樂事多人仰祝君侯壽君侯原是飛天

仙堂上垂簾樹影連一雙白鶴對琴舞永日惟橫栢
子煙海外傳書到青鳥贈之五色安期棗願侯從此
享千秋玉珮金魚長不老

送徐司理檢吾擢南民部

時郡國大水

世上浮名憎太速登朝豈必誇鈞軸福星偏照舊
京會有能臣問錢穀使君行部六年餘東南民力復
何如水旱頻仍賦役并杼柚其空倉廩虛君王方
軫東南苦長干六月霜為雨拊髀太息先循良為我
蒼生試人部祇今澤國水湯湯使君中夜思徬徨持

不之膠束口矯節應開河內倉金陵山水故信
仙郎按轡來天際送別江皋何所言霏霏舊雨荆秦
地九重之聽高於天願君關白司農前元元可受
田租賜內帑何難百萬錢

詹太侯迎養太夫人

東來紫氣鬱且葱元峯山翠削芙蓉關吏占星星欲
近鳳軒鸞馭來雲中顏如丹髮未白雙瞳半帶仙人
碧綵霞幢蓮花情葆羽紛紛滿城陌導輿者誰二千
石生平飲冰惟啣栢夫人下車祥為懌崔邠往矣侯

續之勒諸冊青永作則

送燕郡丞鴻洲

秋江之水如苔綠月白潮平轉艫舳君侯千里整去
裝滿城齊唱陽關曲兒童父老攀征車臨歧瞻望猶
躊躇行李蕭蕭何所有一匣芙蓉一匣書解印遙從
帝京走吾儕慷慨重搔首噴噴廉名冰檠清道傍
歌謠碑是口津亭黯黯敞離筵欲別難別情悽然須
更帆挂遠天際寒烟高柳鳴秋蟬娥眉詎云仍見
又是書屏存簡注旭日丹心懸赤墀循良終借

恩顧 聖朝獨屋東南憂三吳聲望屬君侯咫尺徘徊
整分袂未幾膏雨潤滄洲

贈項令君東鰲考滿

君侯為令甫一朞三年報政旋及期在在賢良著聲
績神明惠愛兩兼之請看漢庭循吏傳龔黃卓魯名
不賤那得才鉅似君侯歷試河陽經百鍊琴堂燁燁
飛雙鳧召父杜母歡相呼積有勤勞最高第監司曰
可 帝曰俞東南旱魃歲為苦上書借寇歌而舞善
政能消六合塵恩波洗濯霏膏雨三泖之水九峰雲

秋天颯爽含晴曛君侯冰雪清如許中腸豈受麩葉
醺吾曹編氓懷孔通望來軒蓋成霞舉願從父老樂
管絃長挈壺漿獻公所

送洪九玄歸魯

與子初別離會面未有期不謂行邁間邂逅鄒魯墟
相憐逆旅客揮觴道疇昔秣馬復脂車壯我歸來色
臨歧悵悵兩情傷佇立徘徊對夕陽別後望雲思舊
雨片帆飛入葦城裡忽然聚首又忽別人生離合常
如此

壽項令君

芙蓉九朶山光明碧嵐遠射泖水清家家如游太古
俗入戶但聞絃歌聲後有黃童前白叟左有壺漿右
牛酒拜向君侯競致詞野人三祝華封壽自言氣數
何其偏曩逢儉歲今豐年平原日暖芳草合千村萬
郭犁晴烟柔桑初青柳枝綠社鼓聲中啼布穀五風
十雨安且閒桔槔懸林但耕讀君侯卓魯豈足多鶴
鳴子和當庭柯垂簾依微篆烟繞河陽滿樹花婆娑
綺筵正及長羸會槐影棠陰榴更媚黃鳥翩翩紫燕

何二抄卷四集
翻南薰一曲真堪醉金笙銀管不曾停雲裡仙璫更
可聽赤鳳啣將 璽書至福星光耀連台星

贈許水道鴻川

東南河伯歲為苦旱魃紛紛向人舞五年城郭盡江
河兩載江河類焦釜以茲三吳多侵殃陂澤錯壤皆
水鄉春穀不登秋不熟海邑湖光萬里長 天子軫
念通水利分符授璽使君至使君下署事訐謨胼胝
劬勞親指視立馬驅車覽大荒支源析派列封疆萬
戶相從躬濬滄千人自集裹餼糧吳淞襟帶泊江瀨

分合吐納具區在蜿蜒廣衍引衆流翕受善巖崑大
海從今澤國藉經營水落長淮潮汐通春雨春烟歌
和鍾遙見宣防瓠子宮瓠子宮成沉白壁 九重還
以玄圭錫千秋誰註河渠書金馬高懸太史筆

贈張虞侯

咄哉吾郡有奇士毫端五色凌秋旻賦就絕倫似楊
子興來慷慨如荆卿向人輒弄陽春調矯矯飛揚疑
有神獨誇傾蓋論交日便存肝膽言恂恂我儕懷之
惟恐後彼夫齷齪寧足論頻年獻策頻不報甘心雲

何二抄卷四集
詩
臥南海濱嗟嗟君有如此才而何兀兀困風塵我亦
浮沉世路者相對相憐情轉親良驥伏櫪志千里尺
蠖雖屈時亦伸劔在匣中仍謁楚書成闕下肯干秦
日月不昏空倚杖乾坤未老負垂綸陡然大咲還擊
筑知君與我不終貧功名雖富道德貧羞殺當年得
志人丈夫期許在千古泥塗安足沉此身

送沈孺休遊豫章兼訊張宗伯鄧太史喻憲副
沈郎善貧復善詩挾劔携囊安所之來索西江雙鯉
信為言此去謁吾師吾師張夫子學士鳴珂里名將

山斗齊道與伊周比脩然欲脫塵網中一意徃從黃
石公館有閒雲自棲逸徜徉常枕松風石鄧太史喻
使君三人結納海內聞太史玄言霏玉屑使君彩筆
落霧氛我昔挂名門下籍無從數數通殷勤沈郎去
吸西江水試與相從問行止安石可奈蒼生何何為
乎高卧東山輒不起

題朱明初麗

序屬朱明風日晴花羅剪春香霧輕金屏翠帷尊兩
極醴泉芬芬沆薤清彈玉箏者董雙成還向使君歌

長生珮環涓秀瑜珥晶人間此樂豈易并願吹溱水
添瑤觥靈椿不凋霜不傾年年珠履花間迎鳳雛啣
書來帝京長空燭影照飛旌千秋萬葉鍾鼎銘

壽王令君懷我

鶯啼新柳春風和六街烟火光模糊鰲山東望蓬瀛
近士民燕賞方絃歌海日高升際春曉隱隱西方下
青鳥若侯嶽誕及斯時盤貯椒花與瑤草縣門笑兩
七香車綠睛童子弹琵琶花放燈交潘岳樹月明丹
黃葛洪砂長畫赫香簾幌靜鹿卧松根觀花影芬敷

柳交流公門瑞靄藍田生玉頰試聽汝南月旦評三
吳古乃不鳴賢聲擊壤提壺通郊野歡歌鼎沸遠承明
挾纓息深春解凍相隨齊獻賢臣頌漢庭從此重循
良苑却雲中啣詔鳳

贈別南中友人

我從九峯走帝州停車攬纜鍾山頭鍾山王氣毓豪
傑相益蓋是風雅流校文覓句時連席咄咄眼青後
眼向興來落帽雲霞騰卓爾才情一當百慙子飯生
弟與兄襪線那堪共結盟獨幸諸君借噓拂遂令白

社起芙蓉處處蒸，倚玉樹，因君紙貴三都賦。朝夕
爭馳翰墨場，胡然造物偏生妬。遊子羈棲憶故鄉，千
里寒風驛路長。駕言行遠去斯館，頃刻天涯離思狂。
君來送我河之送，我來別君山之岷。我歸一似水西
流，君留一似岳南峙。鳥戀同枝悲異林，况是人生商
與參。執手徘徊烟霧裏，沾裳清淚可能禁。

有客七章章五句送尹公權南征應試

有客有客浮大江，大江明月入船窗。中流汲水玉為
缸，送爾片帆飛渡去。肯令秋苑對殘缸。

其二

有客有客之白門，白門垂柳手可捫。古來多少送王
孫，折得一枝留爾住。碧天秋色滿江村。

其三

有客有客向石城，石城舊是帝王京。鬱葱佳氣拂行
旌，安得贈君倚天劍。雄飛直上登蓬瀛。

其四

有客有客渡秦淮，秦淮之水茫無涯。長流滾滾龍蛇
埋，知爾詞源倒三峽。行舟雖小氣能排。

其五

有客有客走長干長干之里何粲粲秋到街頭日幾
竿遊子踏歌紅玉板携婦戴桂闥芳蘭

其六

有客有客登鳳臺鳳臺之上封蒼苔差我突兀雲邊
開今之白也裁詩處鳳凰飛去復飛來

其七

有客有客來鍾山鍾山王氣指天關海日中天近可
攀看君袖裏多雲物到處芳菲桃李顏

壽冲玄張先生

秋山蒼莽秋雲涼秋天皎皎月如霜秋江澹蕩秋水
綠藻荇交橫菰米香張公嶽降逢秋仲羅筵肆席開
華堂雲裡紛紛絲竹響雙翩翩青鳥翔徘徊為報
長生訣纓絡珊瑚雲錦章張公雀冠復鶴髦朱暈醜
顏髮未黃宮錦緋緋輝彩袖斑斕進酒庭之傍琥珀
色琉璃光金尊滿貯南山酒玉椀新盛北斗漿冰桃
灼爍間雲藕雲教迭奏翻霓裳張公入夜興未央支
筇小醉還徜徉兩世通家子弟行慇懃拜舞添霞觴

何士於芝園集
祝公遐笑千秋長

贈吳醫士端所

夫君年少婉清揚玉質翩翩傲骨香一朝謝去經生業欲將鑿國擅名場披褐衡門高素抱方書雅志從吾好手探青囊不絕吟義薄黃金那問報當時采藥已知名戶外喧闐車馬聲察脉投劑通奇術能令病者多起色願君持此壽邦人嬰兒無殤老無疾

贈許山人丹山

許君來自丹山側無數烟霞挂胸臆落筆縱橫翰墨

場毫端掃盡千巖色况誇才巧逼天工長嘯狂歌起暮風眼前不少丹青手誰似君家氣魄雄

送丘學博之山東

先生教授葺城中桃李崢嶸千萬叢忽有文星照魯地雄風遂擁皋比去章縫送別河之梁殷勤進酒思徬徨無數攀留留不得天南天北兩相憶

贈翁子德

未見相憶深一見即披襟君能知我意我亦知君心把酒西湖上亭亭雲外想倏忽大風過別去多惆悵

何士揚詩集
去時為約春風來楊柳初青一棹開不謂淹留幾月
許隔水盈盈那得語此時望斷故人車湖上逢君分
手處

題茗溪談氏永思堂

君家構堂潯水湄有額其堂云永思何事淒淒陰雨
夜沾襟三復蓼莪詩為言祖父恩罔極相繼淪亡使
我惻悲來忽憶舊音容孤魄游魂歸不得幾回攏首
傳素輅落木蕭蕭風颯颯風木百年成愁絕哭聲直
上千層霄飲血椎心腸幾折顧瞻此堂思往哲皇天

長照孝慈心繚繞白雲覆雙穴

贈雲水道人

君挾飛仙海外行前頭何處是蓬瀛去來來去不相
見寄語為訪安期生安期之棗大如瓜我欲從之茹
其華那得息機塵世後與君跨鶴食朝霞

千人石夜坐同孫世聲史舜舉

虎丘山腰一片石天工琢削平千席風雨年年繡綠
苔千人萬人時棲適我來四望紫霧收杖頭携得登
山屐長堤亂踏落花枝冉冉涼風隨兩腋舉頭仰天

何士拙芝園集
天河明正是霜清雲白夕牽衣拂面烟霞生坐上相逢俱岸幘紅妝小婦起彈箏按來三疊霓裳拍尊中桑落酒花香玉盃盈盈浮琥珀興豪百斗潤詩腸歌起雲停人辟易人生莫遣千年憂誰道韶華能滿百名山趁此足遨遊漸老秋光良可惜夜分無那入孤航醉眼看山山倒碧

贈丹徒令君張喻齋舊父母

美人為政樂難支巷誦途歌去後思此日花封接鄰壤新雨舊雨還堪想河陽桃李勾漏砂那如仙令教

葉麻我華凋瘵潤州瘠水旱頻年徧阡陌即今兩地都絃歌人人食糜且衣帛不必甘棠覆草萊但看黔首登春臺壺漿竹馬遙相待恠問君侯來不來

詠張侯署中古柏

公廨亭亭雙古柏黛色干霄幾百尺上有喬枝下有根枝如青銅根如石丹徒縣裏無數花桃穠李豔飛流霞那如此柏凌霜雪覆蓋團陰千萬家年年夜夜啼烏聚漢省風流賦佳句他日柏臺民咏歌於今手植甘棠樹

遊招隱寺同郭次甫陳從訓孫世聲

白雲繚繞入山深古寺蕭條絕人跡舊有昭明太子
臺更聞處士戴顓宅荒草萋萋歷斷碑森森松竹亭
亭柏虎跑鹿跑泉可烹伏流何處窺泉脈登高一望
長江流四圍縹緲山光碧高隱應從此結廬不知誰
是緱山客

呈舅氏巢邑馬令君

花縣臨江江亦奇聞是神君報政時神君曰誰我舅
氏嗟叔度來何遲野多瑞麥標雙穗門揭冰壺畏

四知父老提筐將斗酒兒童騎竹進交梨琴聲處處
隨歌咏輿頌人人是口碑監司賢之屢薦列召父杜
母民所思天書十道徵循吏指日緋衣拜赤墀喜看
玉洞靈椿茂老翁白髮如銀絲春晝署中翻綵服何
以壽之金屈卮鍊成勾漏千年藥啖取蓬壺五色芝
我今渡江謁舅氏秋風仗劍披陸離為說三年違讌
笑那堪骨肉常參差天北天南相憶處總是人生良
晤期紫綬烏皮各事事丈夫寧必問雄雌瀕行飲我
堊落酒寄聲一訊堂上慈片颿東歸歲將暮折得殘

秋菊幾枝譚兵說劔意慷慨此身許人宜不宜舅氏
無煩將母慮江干不唱渭陽詩

遊攝山棲霞寺同孫世聲

夜宿龍潭古驛樓朝來匹馬棲霞遊棲霞蕭寺依山
半紫烟隱隱浮霄漢古柏喬松蔭道周餘花落葉時
凌亂聳然巖壑自天開石壁峻嶒亦怪哉山腰山腹
鏤千佛遺像還從陳隋來山阿白鹿曾棲止流泉石
冽寒潭水波迴功德噴真珠突出蓮花清澗裏萬石
鐘聲嶺外傳飛來神物豐山巔行到雲深塢西均別

有境界如神仙老僧出迎小僧笑隔院琴彈碧玉調
跌坐蒲團叩佛緣兩兩龍吟雙鶴叫同遊携手是孫
郎一拍高曼發長嘯無奈門前車馬催不堪回首者
雲嶠吾生那得歲月閒一年一度來名山青嶂丹丘
儘自適僕僕羞為遊子顏

渡江篇投陳比部子有

憶昔與君渡江日江流萬里何茫茫忽然半渡風雨
作風聲震撼雨聲涼兩人相詫復相慰擊楫中流意
更狂丈夫不作牛衣泣高嘯豪吟渡夕陽驛路關河

何士抑芝園集
時邂逅携手前村索酒嘗飛來雪色驅人北並馬駸
駸入帝鄉同賦長楊我落魄君留射策獻明光須
史官轍鍾山側鍾山縹緲雲霧香玉勒嘶殘紅板月
彩毫驚墮白門霜紙貴三都披錦繡囊携五色滿縹
緗我尚颺颺蓬徑裡支杖徘徊松菊傍有時漫憶絲
袍好無奈迂踈雙鯉將高秋覓得江頭棹衰柳殘渠
送客航到日何從下縣榻尊前風雨對藜牀秦淮故
舊如君少雷連繾綣寧尋常我欲從之問江水相看
索句又河梁

投贈表兄王後陽

先是由郎署補郡侯時偶以
註誤謫居都下

熊車乍指楚江頭道旁行人秣紫駟註誤無端懼吏
議南遷又入舊神州何似居然二千石垂首低眉關
內侯青山巔白雲側男兒到處何不適出處由來各
有時登庸豈必皆崇陟况君吏隱足逃名五斗優游
不家食新恩頃刻日邊來綸詔霏霏銜五色我今一
踏秦淮隄與君憫勞嘯雲泥君擊唾壺我擊筑我歌
易水君歌驪獨憐南北徵兵動鼙鼓中原滿地皆狼
虎蒿心那得匡時謨執手臨岐嘆靡盬

贈殷比部開美

先是開美為北武選

殷使君殷使君司馬才名天下聞
白璧豈受青蠅玷
直以高嘯開卿雲南來諸山如錦織
使君攬轡嘶玉勒芙蓉霜冷劔花香
命酒賦詩山之側君不見大鵬扶搖
萬里飛六月息其翼即看指日駕熊車
雄風矯矯通八極方今遼海集餘艤
賀蘭馳羽檄廟堂宵衣且盱食
方叔行將攄壯猶坐令中原剪荆棘

贈別袁叔含正孺兄弟

我聞豫章袁兩生翩翩有美佳
公子策馬鍾山謁我

師幸得相逢官署裏見時握手歎生平
唯存肝膽在汝爾兩生廣額復修眉
脩然七尺揮十指何物英英能逼人
鳳凰之毛麟之趾年華纔及終童齡
遂有才情二陸比一從几案讀竒文
文光遠射山光紫援毫潑墨雲霞飛
時輩當壇讓牛耳慙余偃蹇老經生
尚是吹噓借唇齒獨將千古結襟期
相盟不朽垂青史可奈西風冷敝裘
與子別離有日矣嗟嗟分手便天涯
誰能常聚如鹿豕願言努力及春秋
各自緘書寄雙鯉他日聯鑣燕市頭
還曾憶否長千里

題許山人觀南橋西草堂

鍾山之陽草堂前茅茨一帶多人烟有士開門呼我
入焉知大隱與神仙問君何事高棲者蕭蕭抱膝衡
門下世間爭利且爭名市上驅車復驅馬不如身與
白雲閒盡日婁娑五柳間橋西一派滄浪水清流濁
流洗其耳籬下依稀玉洞隈澗中彷彿瑤池裏我聞
支公逃禪欲買山戴逵尋幽常處宅如君信是千秋
人獨於朝市隱踪跡

壽陳從訓

與君交臂在秋深逢君懸弧在冬杪秋去冬來客未
歸猶及山中見青鳥青鳥飛來度竹房群仙遙滌紫
霞觴霓裳曲奏天花落窈窕尊前珠蕊香脩然一丘
與一壑鹿裘籜冠自行樂胡床高卧起盤桓百尺蒼
松千歲鶴後貌鼎科斗書倚琴長嘯帶經鋤無酒則
飲有酒舞詩歌陶謝賦相如即今壺中駐日月面是
朱顏已如髮願君從此丹砂成他日相携採薇蕨

壽倪偉長

古來高士雙寂莫心跡脩然在丘壑吾聞虞山倪隱

君身混漁樵家負郭山頭怪石何嶙峋一片嵐光接
水濱隱君於此聊卜築里無曲突巷無輪門掩菰蘆
戶珠網傲睨公卿不厭貧自攝浮華如電瞥銳意千
秋追往哲脈脈重淵可比心磊磊貞珉堪擬節能讀
丹經煉石砂高談語語帶烟霞有時飲酒對名勝有
時賦詩踏落花採藥殮芝食靈蕨披霧排雲弄明月
抱影逍遙丘壑邊阮生長嘯稽生絃世人徃徃輕縫
掖君今但枕松風石綠水青山不負君如君信是幽
棲客

送蘇爾宣歸吳門

君昔報仇在新安君今避仇在吳市剛腸俠烈古荆
卿眼中之人誰得似時時裹糧八極遊奚囊所有惟
圖璽圖璽從來不乏人獨君鏤刻都而美出入先秦
兩漢間腕中突兀龍蛇起知君無限不平心縱橫寸
鐵聊爾爾歲暮送君君且歸那能常聚如鹿豕請君
采石碧山巔磨成丹入機雲里桃花萬樹酒百壺相
携共醉春風裏

送陳錫玄壯上

何士披卷函集
詩
送君先上長安道
滿路秋光淨如掃
行囊携得杖藜
烟塞月燕雲接
回船北流一派
黃河水君欲舍
旃跨綠耳此馬
金羈玉勒馳朝
天蹀躞任所之
願君少緩駢駢
轡曲江待我來
同醉

送閩友王學博葵中補選北上

與君邂逅丹陽道
帶雨憑風到秣陵
秣陵四月清和
候萬嶺千巖爽
氣增况復偕行
田叔在相看携
手是良朋我欲
招尋同策杖極
目名山選勝登
君今忽漫凭車
軾馳逐天南又
天北途中那用
驪駒裘旅次誰

食苜蓿食知君聲
望滿京華銓曹不
次廷推亟絳帳
臯比未西暮轉
眼飛鳴奮高翼
金鑾射策八閩
豪先後奎躔標
紫極瀕征願唱
驪駒歌四牡駸
駸壯行色

何氏芝園集七言古詩完